

## Knowweloach iss gesund

Vor e paar Daach hott mischs Kättche oogerufe: Honnes, du musst widder mol meddem Schorsch redde, der Monn reescht misch uff.

Ei Kättche, saach isch, was hodder donn, doin Schorsch, unn wessdeweese soll ischenn oorufe?

Dess Kättche hott bald geflennd. Dess soller dir sellwer saache. Froochen oofach, obber omm Somsdaach nitt oikaafe gewese iss, du hättsden doch sunnst immer geseh unn omm Somsdaach nitt, obber kronk wär odder was. Mach dess bitte, Honnes.

Unn genau dess habb isch gemacht, habb de Schorsch oogerufe unn gefroochd, obber kronk wär, weil isch enn nitt beim Oikaafe geseh hätt oder obs sunnst ebbes Neies gewwe deet.

Naa, hott de Schorsch ze Antwort gewwe, naa, isch bin nitt kronk. Unn Neies duts aach nitt gewwe. Wie kimmsde donn doo druff?

Doo habb isch geschwindeld: Ei weil mich de Nochber gefroochd hott, ob du kronk bist, weil du hättst alloo beim Rewe onn de Kass gestonne unn hättst alls gehusd. Iss ebbes medder?

De Schorsch hott ins Telefon gelachd. Isch habb nitt gehusd, isch habb gehauchd. Also duts wirke.

Isch frooch: Was dut wirke?

Honnes, seet de Schorsch, dess iss merr gons schee uff die Nerve gonge, wenn isch beim Aldi odder beim Rewe onn de Kass gestonne habb unn hinner merr iss ooner odder oo su noh onn misch kumme, dass ich saache musst: Abstand halle! Awwer weil isch donn meisdens schebb oogeguggd worrn bin, habb isch mir ebbes ausgedenknd und dess dut wirke.

Jetzt war isch neigierisch: Was hosde derr donn ausgedenknd?

Doo seeder: Isch habb merr enn Haufe Knowweloachzeh kaaft unn vunn dene numm isch jetzt schunn moins beim Friehtigg e Portion. Unn seitdem habb isch Platz onn de Kass. Su war dess aach omm Somsdaach. Doo hott misch doch su enn junge Kerl beim Aldi dess Laufbond entlong nooch vorne drigge wolle, awwer wie isch misch gleich erumgedrehd unn kräffdisch dorsch moi Maske gehauchd habb, hodder enn Satz riggwerrts gemacht. Unn onn de Kass vumm Rewe hott misch e Fraasche vorgelosse, Sie haben es doch bestimmt eiliger als ich, hottse gesaad unn sisch die Nas zugehalle. Unn außerdem iss Knowweloach gesund.

Awwer nitt ferrs Ehelewe, saach isch, weil du musst Riggsischd uff dess Kättche numme, sunnst habbderr bald getrennte Schloofstubbe.

Doo hotts enn Aacheblig gedauert, bis de Schorsch widder ebbes gesaad hott: Dess Kättche hott disch oogerufe, gell, Honnes? Die iss joo mett dem ville Knowweloach nitt oiverstonne unn hält aach beim Fernsehgugge Abstand vunn merr. Awwer isch kann dess Gedrängel onn de Kasse halt nitt leide, was soll isch donn mache?

Schorsch, saach isch, doo schreibsde enn Zeddel unn wenn derr jemond ze noh kimmt, hälsde dem de Zeddel hie.

Doo frächderr: Was soll isch donn uff den Zeddel schreiwe?

Isch habb ins Telefon gegrinst. Vorsicht, bissiger alder Mann.

Eiern Honnes